

आकाशवाणी

खबरां पूनम डोगरा कोला

- 1 प्रधानमंत्री नरेंद्र मोदी होर अज्ज कर्नाटक, आंध्र प्रदेश, तेलंगाना, तमिलनाडू ते केरल दी 5एं दिनें दी जातरा पर जा'रदे न।
- 2 देश च पेट्रोल ते डीजल दी कीमतें च 2 रपे फीह लीटर दी कमी कीती गई ऐ।
- 3 गृह मंत्री अमित शाह होरे नमीं दिल्ली च डिजिटल आपराधिक मामला प्रबंधन प्रणाली दा वर्चुअल ढंगे कन्ने उद्घाटन कीता।
- 4 निर्वाचन आयोग नै चुनावी बांड कन्ने सरबंधत डाटा अपनी वेबसाइट पर अपलोड करी दिता ऐ।
- 5 रूस च त्रऊं दिनें तगर चलने आहले राष्ट्रपति चुना लेई अज्ज थमां वोट पाने दी प्रक्रिया शुरू होई गई ऐ।
- 6 लक्ष्य सेन नै बरमिंघम च ऑल इंग्लैंड ओपन प्रतियोगिता दे क्वार्टर फाइनल च अपनी थाहर बनाई लैती ऐ।

<><><><><><>

PM-Tour

प्रधानमंत्री नरेंद्र मोदी होर अज्ज कर्नाटक, आंध्र प्रदेश, तेलंगाना, तमिलनाडू ते केरल दी 5एं दिनें दी जातरा पर जा'रदे न। उंदा दौरा अज्ज तमिलनाडू दे कन्याकुमारी थमां शुरू होग। प्रधानमंत्री होर इस दरान केई बड्डे रोड शो बी करडन। श्री मोदी होर अज्ज दिनें 11 बजे कन्याकुमारी दे विवेकानंद कालेज परिसर च भारती जनता पार्टी दी राज्य इकाई आस्सेआ आयोजित जनसभा गी संबोधित करडन। जिले च सुरक्षा दे व्यापक प्रबंध कीते गे'न। एहदे परेंत प्रधानमंत्री होर तिरुअंतपुरम लेई रवाना होई जाडन। श्री मोदी होर अज्ज केरल च एनडीए दे चुनावी अभियान दी अगुवाई करडन। ओह पथनमथिट्टा च जनसभा गी संबोधित करडन। प्रधानमंत्री होर कर्नाटक च द'ऊं सार्वजनिक रैलिंग दरान भाषण देडन। बीजेपी दे राज्य महासचिव ते विधायक सुनील कुमार होरें दस्सेआ ऐ जे श्री मोदी होर कल 16 मार्च गी कालबुर्गी च ते फीह 18 मार्च गी शिवामोगा च रैली करडन। श्री मोदी होर इस म्हीने दी 18 ते 19 तरीक गी सलेम ते कोयम्बतूर जाडन ते पार्टी लेई लोकें दा समर्थन हासल करने दे मकसद कन्नै जनसभा करडन।

<><><><><><>

Petrol Diesel

देसै च पेट्रोल ते डीजल 2 रपे सस्ता होई गेआ ऐ। नमियां दरां अज्ज बड्डलै 6 बजे थमां लागू होई गेइयां न। पेट्रोल ते कुदरती गैस मंत्रालय नै आखेआ ऐ जे एहदे नै उपभोक्ताएं दी खर्च करने दी समर्थ बधोग ते डीजल कन्नै चलने

आहली 58 लक्ख बड्डी गड्डिएं, 6 करोड़ कारें ते 29 करोड़ दो पहिया वाहनें दा परिचालन खर्च घट्ट होग। दिल्ली च पेट्रोल दी कीमत हून 94 रपे 72 पैसे लीटर ते डीजल दी कीमत 87 रपे 72 पैसे लीटर होई गई ऐ। पेट्रोल ते कुदरती गैस मंत्री हरदीप सिंह पुरी होरें आखेआ ऐ जे पेट्रोल ते डीजल दी कीमतें च कमी देशवासिएं दे हितें प्रति प्रधानमंत्री नरेंद्र मोदी हुंदी प्राथमिकता गी दर्शादी ऐ।

<><><><><><>

Shah

केंद्री गृह मंत्री अमित शाह होरें देश च पेट्रोल ते डीजल दी कमीतें च कमी करने दे उंदी सरकार दे फैसले दी बडी मती सराहना कीती ऐ। इक सोशल मीडिया पोस्ट पर शाह होरें गलाया जे उंदी सरकार दे इस जत्ने कन्ने पिछले ढाई बरें च पेट्रोल दी कीमतें च 15 रपे फी लीटर ते डीजल दी कीमतें च 17 रपे फी लीटर दी कमी आई ऐ। उनें प्रधानमंत्री हुंदा एह फैसला लैने लेई आभार प्रगट कीता।

<><><><><><>

Amit

केंद्री मंत्री अमित शाह होरें कल नमीं दिल्ली च राश्ट्री जांच एजेसी एनआईए आस्सेआ तैयार कीते दे इक्क बक्खरे किस्मां दे डिजिटल अपराधक मामला प्रबंधन प्रणाली दा वर्चुअल ढंग्गै कन्ने उद्घाटन कीता। आतंकवाद खिलाफ

लड़ाई ते अपराध उप्पर नियंत्रण करने दे लक्ष्य कन्नै इस सिस्टम गी तैयार कीता गेदा ऐ। समारोह दौरान गृह मंत्री होरें एनआईए दे जम्मू ते कोच्चि च दो नमें शाख दफ्तरें ते रिहायशी परिसर दा बी उद्घाटन कीता। शाह होरें राष्ट्री अपराध रिकार्ड ब्यूरो आस्सेआ तैयार इक्क मोबाइल ऐप जेड़ा नमें आपराधिक कन्नू सरबंधी इक्क संग्रह ऐ, दा बी उद्घाटन कीता। नमां विकसित कीते दा एह क्रिमिनल केस प्रबंध सिस्टम एनआईए अधिकारियें गी आतंकवाद कन्नै निब्बड़ने ते आपराधिक मामलें पर रोक लाने ते न्याय दी प्रक्रिया च तब्दीली लेआने दे कम्म च मददगार साबत होग। रायपुर ते जम्मू च खुल्ले दे नमें परिसर एनआईए अधिकारिएं ते कर्मियें गी आतंकवाद ते वामपंथी उग्रवाद दे खतरे कन्नै निब्बड़ने लेई राज्यें च कम्म करने लेई इक्क सुरक्षित माहौल बी प्रदान करोग। इस मौके पर गृह मंत्री होरें राज्य दे पुलस महानिदेशकें गी प्रभावी जांच ते संचालन लेई आधुनिक साफ्टवेयर दा इस्तेमाल करने लेई गलाया। गृह मंत्री होरें गलाया जे एह प्रणाली राज्य पुलस दे आतंकवाद विरोधी दस्ते ते केंद्र ते राज्य एजेंसिएं बश्कार सहयोग गी होर बधाग।

<><><><><><>

Electoral-Bonds

निर्वाचन आयोग नै चुनावी बांड कन्नै सरबंधत आंकड़ें अपनी वेबसाइट पर अपलोड करी दिते न। भारती स्टेट बैंक नै सर्वोच्च अदालत दे निर्देशें दी पालमा करदे होई इस म्हीने दी 12 तरीक गी चुनावी बांड सरबंधी आंकड़ें आहला ब्यौरा

चुनांस आयोग गी उपलब्ध करोआया हा। एह डेटा वेबसाइट www.eci.gov.in/candidate-politicalparty पर उपलब्ध ऐ। चुनांस आयोग नै आखेआ ऐ जे उन्नै म्हेशां स्पष्टिकरण ते पारदर्शिता गी खास महत्व दिता ऐ।

<><><><><><>

Russia-Election

रूस च त्र'ऊं दिनें तगर चलने आले राष्ट्रपति चुनांस लेई अज्ज वोट पा जा'रदे न। त्र'ऊं दिनें तगर चलने आहले मतदान लेई शुरूआती ते डाक मतदान दी प्रक्रिया पैहले गै शुरू होई गेदी ऐ। राष्ट्रपति ब्लादिमीर पुतिन होरें देशवासिं गी वोट पाने दे हक्क दा इस्तेमाल करने दी अपील कीती ऐ। श्री पुतिन हुंदे अलावा त्रै होर मेदवार निकोलाई खारितोनोव, लियोनिद स्लतस्की ते व्लादिलाव दावानकोव बी चुनांस मैदान च न। जेगर पुतिन होरें गी 5में कार्यकाल लेई चुनी लैता जंदा ऐ तां ओह अगले 6एं बरें तगर ते 2020 च उंदे अस्सेआ संविधान च कीते गेदे संशोधन मुजब बरे 2036 तगर हकूमत करडन।

<><><><><><>

Brazil

भारत ते ब्राजील बश्कार पैहला राजनीतिक ते सैन्य संवाद कल नमीं दिल्ली च आयोजित कीता गेआ। विदेश मंत्रालय दे प्रवक्ता रणधीर जायसवाल दे सोशल मीडिया पोस्ट च दस्सेआ गेआ ऐ जे बैठक दौरान रक्षा अंतरिक्ष उर्जा, महत्वपूर्ण खनिज, प्रौद्योगिकी, आतंकवाद विरोधी ते क्षेत्रीय, बहुपक्षीय ते आपसी हित दे होर

दुए मुद्दे उप्पर चर्चा होई। भारत दी तरफा विदेश मंत्रालय च संयुक्त सचिव विश्वेशनेगी होरें इस बैठक दी सह अध्यक्षता कीती।

<><><><><><>

Election

रिटयर्ड आइएएस अधिकारी घनश्याम कुमार ते चुनांस कमिशनर नियुक्त कीता गोआ ऐ। कन्नू ते न्यास मंत्रालय नै इस सरबंधा च इक अधिसूचना जारी करी दिती ऐ। अनुप चंद्र पांडे हुंदे सेवानिवृत्त होने मगरा ते अरूण गोयल हुंदे इस्तीफा देने मगरा दऊ चुनां कमिशनरें दे ओहदे खाली पेदे हे।

<><><><><><>

J&K POJK

जम्मू-कश्मीर च विस्थापित ते प्रवासी समुदायें दे आर्थिक सशक्तिकरण लेई इक बड्डी गैह पुट्टदे होई प्रशासन नै कल 350 युवाएं गी अपना कम्म-रोजगार शुरू करने लेई माली मदाद उपलब्ध करोआई। एह सब्बै नौजवान पाकिस्तान दे नजैज कब्जे आहले जम्मू-कश्मीर दे विस्थापित परोआरें, पच्छमी पाकिस्तान दे रिफ्यूजिएं ते कश्मीरी प्रवासी परोआरें कन्नै सरबंधत न। लेफ्टिनेंट गवर्नर मनोज सिन्हा होरें कल जम्मू दे कन्वेंशन सेंटर च इस बारे लोआए गेदे समारोह दी प्रधानता कीती। उनें आखेआ जे इनें युवाएं गी दिती जा रदी माली मदाद कन्नै उंदे सुक्खने पूरे होडन ते समाज च उद्यम कारानादारी गी बढावा मिलोग।

<><><><><><>

Badminton

लक्ष्यसेन बरमिंगम च आल इंग्लैंड ओपन प्रतियोगिता दे क्वार्टर फाइनल च पुज्जी गे न। राश्ट्रमंडल खेड्डें च सुन्ने दा तगमा जित्ने आहले लक्ष्य सेन होरें डेलमार्क दे एंडर्स एन्टोन्सन गी 24-11, 11-21, 21-14 कन्नै हराया। अज्ज क्वार्टर फाइनल च सेन दा मुकाबला मलेशिया दे ली जी जिया कन्नै होग। पी.वी सिंधु होर कल दक्खन कोरिया दे आन से यंग शा हरियै प्रतियोगिता थमां बाहर होई गेइयां न।

<><><><><><>

IMD

भारती मौसम विभाग नै अगले किश दिनें दरान पूर्वी ते मध्य भारत च दरम्याने दर्जे दी बरखा दे इमकान जताए न। विभाग मुजब 14 थमां 20 मार्च तगर अरूणाचल प्रदेश च दरम्याने दर्जे दी बरखा जिसले कि असम, मेघालय, नागालैंड, मणिपुर, मिजोरम ते त्रिपुरा च कुते-कुते हौल बरखा बरी सकदी ऐ।

<><><><><><>